

Minister Otmar Oduber

Turismo ta esencial pa mehora financia publico di nos isla

ORANJESTAD - Minister di Turismo, Transporte, Sector Primario y Cultura Otmar Oduber a presenta su plan di maneho 2013-2017 na tur hefe di departamento di Gobierno. Esaki tabata un encuentro hopi importante pa ehecucion di e plan y primordialmente pa e cartera di turismo.

E mandatario ta splica con a concentra 4 aña di gobernacion pa consolida turismo, a percura pa tin crecemento den turismo pa por genera un entrada faborabel cu Gobierno tabata buscando despues di un recesion economico cu tabatin den e mercado principal cu ta Merca. Tambe a percura pa stabilisa e avionnan cu ta bishita Aruba y pa tur e hotelnan riba isla yega na standard cu nan mester ta pa por brinda e miho servicio na nos bishitantenan.

Pa e proximo 4 añanan Minister Oduber a indica cu lo concentra riba e producto cu ta wordo ofreci na Aruba pa di e forma aki haya un miho distribucion di parti e turista cu ta bin Aruba.

Minister di Turismo ta indica cu a pone metanan hopi ambicioso pa e proximo 4 añanan, unda cu ta premira un averahe 2.5% di crecemento



pa loke ta trata e cantidad di turista, cu ta hopi mas abou cu loke normalmente ta pone como meta. Motibo pa esaki ta cu lo balansa esaki cu un 4% di crecemento di entrada di turista den nos economia. Como un midi lo uza e RefPar cu un crecemento di 9%. Esaki lo contribui na e caha di Gobierno y contribui na fondonan necesario pa e otro ministernan por ehecuta nan plan di maneho y proyectonan.

Pues e cartera di turismo ta esun cu lo mester percura pa e yena e caha di Minister di Financia pa distribui esaki

bou di e otro ministernan pa por haci e tipo di inversionnan aki, e mandatario ta splica.

E meta principal ta keda Producto Aruba, cu ta encera e servicio cu ta ofrece na e bishitante cu lo trece e consecuencia cun'e cu e lo kier gasta mas na Aruba. Sigur hopi importante pa logra esaki ta cu tur departamento mester traha hunto, pa loke ta trata e servicio cu mester wordo duna dor di inmigracion, duana, e seguridad cu mester bin di parti Cuerpo Policial, educacion cu mester tin na scolnan pa e tipo di

servicio cu Aruba kier brinda, un salubridad y un hospital cu mester ta bon mirando e cantidad di turistanan cu Aruba lo bay tin e aña aki, Minister Oduber ta bisa. Den 2014, Minister di Turismo a indica, lo surpasa un miyon di bishitante cu ta bin pa keda na Aruba, mas un averahe di 700 mil cu ta bin Aruba por medio di barconan crucero, pues aki ta papia di brinda servicio na 1.7 miyon bishitante pa aña. E mandatario ta indica cu cada un departamento y ministerio ta forma parti integral pa por logra e meta pa



e turistanan por gasta mas den economia di Aruba. Minister Otmar Oduber ta indica cu turismo ta keda e fuente di entrada mas importante pa Gobierno y mas cu claro mester por conta pa traha hunto cu tur departamento pa por logra e meta poni dilanti pa e proximo 4 añanan. □